



—

Kanegelo ye e bolela ka Kgothatso Montjane.

O belegwe ka 1986 kua Polokwane, lekeišeneng la go bitšwa Seshego.

Mosetsana yo o belegwe a na le bolwetši bjo bo amilego matsogo le maoto a gagwe.

Le ge go le bjalo, o ile a gola a ba naletšana ya thenise ya go tsebega kudu!



E rile ge Kgothatso a sa le ngwana, dingaka tša kgaola leoto le tee ka lebaka la bolwetši bja gagwe. O šomiša leoto la maitirelo.

Bana ba bangwe ba be ba sa nyake go raloka le yena ka lebaka la bogolofadi bja gagwe.

Fela mmagwe o be a mo tšeа bjalo ka ngwana yo a swanago le ba bangwe ka go mo fa mešomo ya ka gae bjalo ka mang le mang.



Mmago Kgothatso o ile a mo romela sekolong sa Helen Franz Special Needs School. Se ke sekolo sa bana ba bagolofadi.

Ke gona mo sekolong se, moo Kgothatso a ilego a laetša ditalente tša gagwe tša dipapadi.

O ile a tsenela metantsho ya *Ballroom* le *Latin American* gona mo sekolong se.



Yo mongwe wa barutiši ba Kgothatso o ile a mo kgetha gore a yo emela sekolo sa bona kampeng ya thenise go la Johannesburg.

Kgothatso o be a se nke a raloka thenise.


Kgothatso o ile a re: "Ke swanetše go yo raloka ka gore ke rutilwe go hlompha batho ba bagolo."



Kgothatso o ralokile gabotse kampeng ya thenise. Se e bile mathomo a leeto la gagwe la go ba moraloki wa thenise wa boditšhabatšhaba wa setulo sa bogolofadi.

O ile a amogela kabelo ya setulo sa bogolofadi le ditlabakelo tša go raloka thenise.

O be a le tseleng ya go ba yo mongwe wa baraloki ba maemo a godimo mo Afrika Borwa ba bagolofadi.



Kgothatso o ile a thoma go tsenela diphadišano tša thenise tša setulo sa bogolofadi lefase ka bophara.

O thopile sefoka sa diphadišano go la Belgium le Switzerland. Thonamente ya thenise ya Swiss e be e le mmamoratwa wa gagwe.

Ka Afrika Borwa, o hlomphilwe gararo ka go abelwa sefoka sa mosadi wa dipapadi wa bogolofadi wa ngwaga.



Kgothatso o ile a tsenela dithonamente tša thenise tša batho ba bogolofadi ka 2013 le 2014 go la Australia, France le Amerika.


O ralokile thenise ya botee a nnoši. A buša a raloka ya bobedi, mo a bego a na le moraloki yo mongwe.



Kgothatso o ralokile gape dipapading tša diparalimpiki, tše o e lego dipapadi tša diolimpiki tša baraloki ba bogolofadi.


Go be go se bonolo go itokišetša diphadišano tše, efela Kgothatso ga se a ka a lahlegelwa ke tshepo.

O ile a tšwela pele ka go phadišana e le leloko la sehlopha sa Afrika Borwa sa diparalimpiki.




Kgothatso o šomile ka maatla dithutong tša gagwe. O tsene Yunibesithing ya Venda mo a ithutetšego tikrii ya Tlhabologo, Dipapadi le Saense.

Gona moo Yunibesithi, papadi ya thenise ya batho ba bogolofadi e be e le yona e nnoši ye e ralokwago ke batho ba bogolofadi.



Wimbledon go la Engelane ke lefelo la go tsebega kudu go tloga kgale mo go swarelwago diphadišano tša thenise ngwaga ka ngwaga.

Ka 2018, Kgothatso o ile a ba mosadi wa mathomo wa mothomoso wa go kcona go fihlelala makgaolakgang go la Wimbledon.




Kgothatso o ile a swanelo ke go tšea leeto la go ya thonamenteng ya Wimbledon, go la Engelane.

Go be go se na tšhelete ya go lefela sefofane le marobalo.

Kgothatso o be a tshwenyegile gore o tlo palelwa ke go ya ka lebaka la tlhokego ya mašeleng.

Ka mahlatse, a hwetša thušo go tšwa sehlopheng sa basadi ba go ba le dikgwebo.



Wimbledon e be e le thonamente ya Grand Slam ya bone ya Kgothatso mo ngwageng wa 2018.

Diphadišano tša thenise tše nne, tše bohlokwa tša boditšhabatšhaba ke Grand Slams.

O bile mosadi wa mathomo wa mothomoso dipapading tša thenise ya batho ba bogolofadi yoo a ralokilego dithonamente tše nne tša Grand Slam ka ngwaga o tee.



Kgothatso ke moraloki wa maemo a godimo wa thenise ya batho ba bogolofadi mo Afrika Borwa le Afrika. Ke yo mongwe wa baraloki ba bahlano ba maemo a godimo ka thenise lefaseng ka bophara.

Godimo ga dikatlego tša gagwe, Kgothatso o tšwela pele ka go thuša baraloki ba bangwe ba bagolofadi.

O laetša gore le ge o na le bogolofadi, o ka kgona go fihlelela se sengwe le se sengwe.



—Dipotšišo

1. Na Kgothatso Montjane ke mang? Hlaloša.
2. Na Kgothatso o thomile bjang go raloka thenise?
3. Ke lefe leina la sekolo sa Kgothatso moo a ithutilego motantsho wa Ballroom le Latin American?
4. Na Kgothatso o tsenetše neng diphadišano tše nne tša Grand Slam? Gobaneng se se le bohlokwa?



Puku ye e hlamilwe le go ngwalwa ka polelo ya Setswana, bjalo ka karolo ya porojeke ya Zenex Ulwazi Lwethu ya 2021.

